



**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՊԵՏԱԿԱՆ ԵԿԱՄՈՒՏՆԵՐԻ ԿՈՄԻՏԵ
ԻՐԱՎԱԲԱՆԱԿԱՆ ՎԱՐՉՈՒԹՅՈՒՆ**

ՎԱՐՉԱԿԱՆ ԱԿՏ N 1515202

ՎԱՐՉԱԿԱՆ ՎԱՐՈՒՅԹԻ ԿԱՍԵՑՄԱՆ ՎԵՐԱԲԵՐՅԱԼ

25 փետրվարի 2022թ.

ք. Երևան

ՀՀ ՊԵԿ իրավաբանական վարչության պետ Ա. Մնացականյանս, ուսումնասիրելով ֆիզիկական անձ Տիգրան Ռաֆիկի Սահակյանի (Անձնագիր՝ AS0493950) վերաբերյալ իրականացվող վարչական վարույթի նյութերը.

ՊԱՐԶԵՑԻ

ՀՀ ՊԵԿ ՀՕՀ վարչության պետի 16.12.2021թ-ի թիվ 1515205 որոշման համաձայն ֆիզիկական անձ Տիգրան Սահակյանի նկատմամբ իրականացվել են օպերատիվ-հետախուզական միջոցառումներ:

Ձեռնարկված ՕՀՄ-ի շրջանակներում պարզվել է, որ ըստ ՀՀ ԱԱԾ Քննչական դեպարտամենտի 24.11.2021թ-ի թիվ 8/7871 գրությամբ ներկայացված փաստաթղթերի և ֆիզիկական անձ Տիգրան Սահակյանի կողմից 13.12.2021թ-ին տրված հայտարարության՝ վերջինս շուրջ 15 տարի համագործակցում է ք. Երևան, Թումանյան փող. 2-րդ նրբ 12 9բն հասցեի բնակիչ Սամվել Ավետիսյանի հետ, որին վերը նշված ժամանակահատվածում վաճառել է իր կողմից նկարված թվով 30 նկարները՝ ընդամենը 75 000 ԱՄՆ դոլար արժեքով, որից 62 000 ԱՄՆ դոլարը Սամվել Ավետիսյանը պարտք է մնացել ֆիզ. անձ Տիգրան Սահակյանին, իսկ մնացած 13 000 ԱՄՆ դոլարը կանխիկ արտարժույթով Սամվել Ավետիսյանը վճարել է Տիգրան Սահակյանին, մասնավորապես՝ 2021թ.-ի հոկտեմբեր ամսին՝ 4000 ԱՄՆ դոլար, իսկ 15 տարվա համագործակցության ընթացքում՝ 9000 ԱՄՆ դոլար:

Ըստ ֆիզիկական անձ Տիգրան Սահակյանի կողմից տրված գրավոր հայտարարության և ՀՀ ՊԵԿ տեղեկատվական բազայի տվյալների՝ վերը նշված նկարների վաճառքը ֆիզիկական անձ Տիգրան Սահակյանը իրականացրել է առանց համապատասխան պետական գրանցման և հարկային մարմնում հաշվառման:

Հաշվի առնելով վերոգրյալը ֆիզիկական անձ Տիգրան Սահակյանի ձեռնարկատիրական եկամուտը կազմել է 75 000 ԱՄՆ դոլար, որը ըստ իր գրավոր հայտարարության համարժեք է 37 125 000 ՀՀ դրամին:

Թիվ 1515202 արձանագրությամբ 27.01.2022թ. հարուցվել է վարչական վարույթ: Պատշաճ ծանուցված լինելով, 23.02.2022թ-ին նշանակված վարչական վարույթի լսումներին ներկայացել է ֆիզիկական անձ Տիգրան Սահակյանի ներկայացուցիչ Արմեն Հարությունյանը (անձնագիր՝ նույն. քարտ՝ 010446144, տրված՝ 01.11.2019թ., 006-ի կողմից, հասցե՝ ք. Երևան,

ք. Երևան, Պոռոշյան 10, փաստաբանական գործունեության արտոնագիր՝ թիվ 2940): Արմեն Հարությունյանը նշված արձանագրության վերաբերյալ ներկայացրել է գրավոր դիմում, Տիգրան Ռաֆիկի Սահակյանի կողմից 20.02.2022թ. տրված գրավոր հայտարարություն և փաստաբանական հարցման արձանագրություն (առդիր 15 թերթ):

Վարույթի հետագա ընթացքը լուծելու նպատակով, հաշվի առնելով, որ վերը նշված արարքը կարող է պարունակել ՀՀ քրեական օրենսգրքի 188-րդ և/կամ 188.1-րդ հոդվածներով նախատեսված հանցակազմի հատկանիշներ, ՀՀ ՊԵԿ իրավաբանական վարչության 24.02.2022 թվականի թիվ /11-8/12746-2022 փոխօգնության գրությամբ հարցում է կատարվել ՀՀ քննչական կոմիտե՝ ի պատասխան 25.02.2022թ-ին ստացված թիվ 06/15187-22 (մտից 10420-2022) գրությամբ հայտնել են, որ ՀՀ քննչական կոմիտեում ստացվել է ՀՀ ԱԱԾ քննչական դեպարտամենտում 15.02.2022թ-ին ՀՀ քրեական օրենսգրքի 188-րդ հոդվածի 2-րդ մասով և 3-րդ մասի 1-ին կետով ֆիզիկական անձ Տիգրան Սահակյանի նկատմամբ ՀՀ քրեական օրենսգրքի 188-րդ հոդվածի 3-րդ մասի 1-ին կետով հարուցված թիվ 58203322 քրեական գործը: Նշել են նաև, որ հետագա նախաքննությունը ՀՀ քննչական կոմիտեի Երևան քաղաքի քննչական վարչության համապատասխան ստորաբաժանմանը հանձնարարելու համար, նույն օրը քրեական գործն ուղարկվել է ՀՀ քննչական կոմիտեի Երևան քաղաքի քննչական վարչություն:

Անհրաժեշտ է նշել, որ համաձայն «Վարչարարության հիմունքների և վարչական վարույթի մասին» ՀՀ օրենքի 49-րդ հոդվածի 1-ին մասի ա) կետի՝ վարչական մարմինը պարտավոր է կասեցնել վարչական վարույթը, եթե՝ անհնարին է տվյալ վարույթի արդյունքում ակնկալվող վարչական ակտի ընդունումը մինչև սահմանադրական, վարչական, քաղաքացիական կամ քրեական դատավարության կարգով քննվող գործով որոշում (դատական ակտ) կայացնելը:

Վերոգրյալից ելնելով և հաշվի առնելով, որ քրեական գործով հաստատված հանգամանքները կարող են էական նշանակություն ունենալ սույն վարչական վարույթի ընթացքը լուծելու համար, հետևաբար վարույթն իրականացնող մարմինը անհնարին է համարում վարչական վարույթի եզրափակումը՝ մինչև վերը նշված քրեական գործով (Տիգրան Սահակյանի մասով) քրեական դատավարության կարգով որոշում (դատական ակտ) կայացնելը:

Ամբողջ վերը նշվածը հաշվի առնելով և ղեկավարվելով «Վարչարարության հիմունքների և վարչական վարույթի մասին» ՀՀ օրենքի 49-րդ հոդվածի 1-ին մասի ա) կետով, ՀՀ հարկային օրենսգրքի 428-րդ հոդվածի 1-ին մասով, ՀՀ ՊԵԿ նախագահի 28.08.2019թ. N 562-Լ հրամանով:

ՈՐՈՇԵՑԻ

Ֆիզիկական անձ Տիգրան Սահակյանի վերաբերյալ 27.01.2022թ-ի թիվ 1515202 արձանագրության հիման վրա հարուցված վարչական վարույթը կասեցնել մինչև թիվ 58203322 քրեական գործով որոշման կայացումը:

ԻՐԱՎԱԲԱՆԱԿԱՆ ՎԱՐՉՈՒԹՅԱՆ ՊԵՏ

[Handwritten signature]



Ա. ՄԱՅԱԿԱՆՅԱՆ